

11°. Ի ժամանակի դարպասի ողորմութեան, Խորհրդականք և Մերունիք պարտին գտանիլ. և Խորհրդական գրագիրն անպատճառ գրեցցէ զանուանս ուխտաւորաց և զտուրս նոցա ըստ որքանութեան յատուկ տումարաւ. և 'ի տալ ուխտաւորաց զգրամն նշանագրեացցէ միշտ և Դարպասճին և Ս. Յարութեան Ռէյլիզն և Ճառաճին առանճին մի ինչ առցեն առանց Խորհրդականաց եւ գրագրին գիտութեան եւ գրութեան, և այնպէս տումարքն պարտին երկու լինիլ. և յետ Զատիկին յատկապէս 'ի մայր տումարն արձանագրել յանուանէ և ըստ գումարիցն յիրատ գրել:

Բայց և յաւուր եկեալ դարպասական և իւզագին դըրամքն քսակով կնքեալ յամենայն երեկոյի յօրթայի սընտուկն դիցեն անպատճառ նշանագրութեամբ որքանութեան և տեսակին: Եւ որքան հնար է սիրով և յորդորելով զուխտաւորսն ջանասցեն Ս. Հարքն շահել և յօժարեցուցանել 'ի տուրս, որ առաւել արդիւնաւոր լինել երեւի. զի լաւ է սիրով զսիրտ ժողովրդոց գրաւել, քան բռնութեամբ:

12°. Ի մէջ Ս. Եկեղեցւոյ եղեալ ամենայն կերպ անօթք եւ թախրմք ձեռամբ Խորհրդականաց 'ի տումար առեալ յանձնեցցեն Աւագ Լուսարարին, և մին 'ի տումարաց կացցէ 'ի Խորհրդարանին, և հետ զհետէ եկեալ յիշատակիքն յերկուս տումարս եւս արձանասցին: Նոյնպէս և Զուխտանն և Մաղաղայից և Մոմատան և գրքատան և ամենայն եկեղեցեաց լիցի անպատճառ:

Եւս և մեռեալ միաբանից և անժառանգ ուխտաւորաց ինչք և դրամք Խորհրդականք կալցեն, եւ գրեցցեն յարդիւնս ըստ սովորութեան Ս. Աթուոյն:

13°. Թէ Վէքիլ թէ Զուխաճի թէ Թերճիման և թէ ով ոք և իցէ 'ի գլխաւոր գործակալաց եւ հասարակաց, բաց 'ի յատկացեալ կանոնական տրոց, մի իշխեսցէ ինքնագլուխ տալ ինչ կամ առնուլ կամ դործել, եթէ չիցեն տեղեակ կամ գիտակ եօթն Խորհրդականք. նոյնպէս եւ ինքեանք իսկ Խորհրդականք մի' համարձակեցին վասն ինչ եւ իցէ պատճառաց 'ի տուրս չափազանցս առ Փաշայս և առ Մուլայս և առ ո՞ր և իցէ բռնաւորս, մինչչեւ իցեն ծանուցեալ մեզ: